

SKUPŠTINA KANTONA SARAJEVO

**ZAPISNIK SA
13. RADNE SJEDNICE SKUPŠTINE KANTONA SARAJEVO,
ODRŽANE 30.03.2016. GODINE SA POČETKOM RADA U 10,00 SATI**

Sarajevo, MART 2016.

Sjednici su prisustvovali poslanici/zastupnici:

STRANKA DEMOKRATSKE AKCIJE

1. Ademović Kemal
2. Čelik Mirza
3. Čomor Eldar
4. Delalić Sabahudin
5. Dovadžija Amar
6. Kozadra Muhamed
7. Mešanović Safet
8. Okerić Elmedin

DEMOKRATSKA FRONTA – ŽELJKO KOMŠIĆ

1. Akšamija Goran
2. Avdibegović Neira
3. Bukva Sejo
4. Kerla Bibija
5. Mehmedagić Mersiha
6. Pindžo Mirsad
7. Vukasović Mario

SAVEZ ZA BOLJU BUDUĆNOST – FAHRUDIN RADONČIĆ

1. Babić Ana
2. Bajrović Izudin
3. Lakota Rasim
4. Pecikoza Fahrudin
5. Marić Zvonko
6. Rađo Dževad

SOCIJALDEMOKRATSKA PARTIJA BOSNE I HERCEGOVINE

1. Srna Bajramović Srna
2. Šućur Slaviša

NAŠA STRANKA

1. Ćudić Sabina
2. Forto Edin
3. Kojović Predrag

BOSANSKA STRANKA – MIRNES AJANOVIĆ

1. Pleho Haris
2. Rasim Smajić

BOSANSKOHERCEGOVAČKA PATRIOTSKA STRANKA – SEFER HALILOVIĆ

1. Halilović Semir

SAMOSTALNI POSLANICI/ZASTUPNICI

1. Bjelak Nermin
2. Aljović Hamed
3. Mekić Amel

TOK SJEDNICE

13. Radnu sjednicu Skupštine Kantona Sarajevo otvorila je predsjedateljica Ana Babić dana 30. marta 2016.godine u 10,00 sati.

Prema evidenciji Službe sjednici su na otvaranju prisustvovala 32 zastupnika, što je dovoljan broj za punovažan rad i odlučivanje, a svoj izostanak pravdali su zastupnici: Selma Filipović, Amor Mašović i Fikret Prevljak.

UTVRĐIVANJE DNEVNOG REDA

Prije prelaska na utvrđivanje Dnevnog reda predsjedateljica je, u skladu sa odredbama člana 161. Poslovnika Skupštine Kantona Sarajevo o prijedlozima zakona po hitnom postupku, u okviru prethodnog postupka, otvorila razmatranje Prijedlog zakona o komunalnim djelatnostima i Prijedlog zakona o komunalnoj čistoći.

Obrazloženje o razlogu hitnosti donošenja ovih Zakona dao je premijer Vlade Kantona Sarajevo, Elmedin Konaković.

U pitanjima i diskusijama na ovu temu učestvovali su zastupnici: Predrag Kojović, Slaviša Šućur, Segmedina Bajramović Srna, Mirsad Pindžo, Muhamed Kozadra.

Na zahtjev zastupnika Predraga Kojovića, predsjednik Kluba Naše stranke, predsjedateljica je dala polusatnu pauzu, kako bi se poslanici/zastupnici dogovorili oko određenih rješenja.

NASTAVAK NAKON PAUZE

Zastupnik Predrag Kojović je dao obrazloženje svog zahtjeva za pauzom, te informisao prisutne da su uspjeli postići saglasnost glede ponuđenih zakona i zamolio premijera da pojasni postignuti dogovor.

Premijer Elmedin Konaković je objasnio da se prijedlog zastupnika Slaviše Šućura prihvata, ali da se mora preformulisati kao amandman o kom će se Vlada izjasniti u kratkoj pauzi prije glasanja o Zakonu.

Predsjedateljica je pozvala prisutne zastupnike da se glasanjem izjasne o prijedlogu da se Zakon o komunalnim djelatnostima i Zakon o komunalnoj čistoći donesu po hitnom postupku.

Skupština je većinom glasova (28 ZA,) usvojila Prijedlog da se Zakon o komunalnim djelatnostima donese po hitnom postupku.

Skupština je većinom glasova (28 ZA,) usvojila Prijedlog da se Zakon o komunalnoj čistoći donese po hitnom postupku.

Predsjedateljica je, u skladu sa prethodnim postupkom, obavijestila prisutne da ima još jedan prijedlog za donošenje zakona po hitnom postupku, a to je Prijedlog Zakona o izmjenama i dopunama Zakona o taksi prevozu.

Zastupnici nisu tražili uvodno obrazloženje, niti je bilo pitanja ili komentara, te je predsjedateljica pozvala prisutne da se izjasne o prijedlogu.

Skupština je većinom glasova (26 ZA,) usvojila Prijedlog da se Zakon o izmjenama i dopunama Zakona o taksi prevozu donesu po hitnom postupku.

SKUPŠTINA JE ZA 13. RADNU SJEDNICU SKUPŠTINE KANTONA SARAJEVO VEĆINOM GLASOVA (29 „ZA“) USVOJILA SLJEDEĆI

1. Poslanička/zastupnička pitanja, inicijative i odgovori;
2. Prijedlog zakona o komunalnim djelatnostima- hitni postupak;
3. Prijedlog zakona o komunalnoj čistoći-hitni postupak;
4. Prijedlog zakona o izmjenama i dopunama Zakona o taksi prijevozu u Kantonu Sarajevo - hitni postupak;
5. Prijedlog odluke o davanju saglasnosti na Finansijski plan Zavoda zdravstvenog osiguranja Kantona Sarajevo za 2016. godinu i odluku o izvršavanju Finansijskog plana Zavoda zdravstvenog osiguranja Kantona Sarajevo za 2016. godinu;
6. Prijedlog odluke o davanju saglasnosti na Program rada Zavoda zdravstvenog osiguranja Kantona Sarajevo za 2016. godinu;
7. Prijedlog odluke o usvajanju "Bilansa energetske potrebe Kantona Sarajevo za 2016. godinu".
8. Prijedlog odluke o potvrđivanju Programa obilježavanja Dana Kantona Sarajevo od 02. do 09.05.2016. godine;
9. Prijedlog odluke o prihvatanju zaduženja Kantona Sarajevo po Ugovoru broj 1. o Amandmanu na Ugovor o zajmu potpisan 27. oktobra 2011. godine između Bosne i Hercegovine i Evropske banke za obnovu i razvoj (EBRD), za Projekat gradskih saobraćajnica;
10. Prijedlog odluke o potvrđivanju imenovanja predsjednika i članova Skupštine KJKP „Gradski saobraćaj“ d.o.o. Sarajevo;
11. Prijedlog odluke o davanju saglasnosti na Program rada i Finansijski plan Fonda Kantona Sarajevo za izgradnju i očuvanje grobalja šehida i poginulih boraca, memorijalnih centara i spomen-obilježja žrtava genocida za period 01.01. do 31.12.2016. godinu;
12. Prijedlog odluke o davanju saglasnosti na Program rada Fonda Kantona Sarajevo za izgradnju stanova za članove porodica šehida i poginulih boraca, ratne vojne invalide, demobilisane borce i prognane osobe za 2016.godinu;
13. Prijedlog odluke o davanju saglasnosti na Finansijski plan prihoda i rashoda za 2016. godinu Fonda Kantona Sarajevo za izgradnju stanova;
14.
 - a) Prijedlog odluke o izmjeni naziva ulica odnosno preimenovanju ulica na području općine Novi grad Sarajevo- MZ Dolac;
 - b) Prijedlog odluke o izmjeni naziva ulica odnosno preimenovanju ulica na području općine Novi grad Sarajevo- MZ Brijesće;
15. Izvještaj o radu Kantonalne uprave Civilne zaštite za 2015.godinu;
16. Izvještaji o radu i finansijskom poslovanju Javnih ustanova za 2015.godinu:
 - a. Narodno pozorište Sarajevo ;
 - b. Pozorište mladih ;
 - c. Sarajevski ratni teatar - SARTR ;
 - d. MES - Međunarodni teatarski festival - Scena MESS ;
 - e. Muzej Sarajeva ;
 - f. Kantonalni zavod za zaštitu kulturno-historijskog i prirodnog naslijeđa, Sarajevo ;
 - g. Historijski arhiv Sarajevo ;
 - h. Biblioteka Sarajeva ;
 - i. Centar za kulturu Kantona Sarajevo;

Predsjedateljica je navela da je zastupnicima dostavljen sljedeći informativni materijal:
- Izvještaj o radu Kantonalnog suda u Sarajevu i Izvještaj o radu Općinskog suda u Sarajevu, za 2015. godinu

Prije prelaska na realizaciju prve tačke dnevnog reda zastupnici su razmatrali Zapisnike sa Stenogramima sa 11. i 12. Radne sjednice Skupštine Kantona Sarajevo. Kako nije bilo primjedbi na iste, odmah se pristupilo izjašnjavanju.

Zapisnik sa 11. Radne sjednice Skupštine Kantona Sarajevo održane 01.02. i 10.02.2016.godine je usvojen jednoglasno (29 „ZA“).

Zapisnik sa 12. Radne sjednice Skupštine Kantona Sarajevo održane 29.02.2016.godine je usvojen jednoglasno (29 „ZA“).

U 11,18 sati se prešlo na realizaciju prve tačke dnevnog reda.

AD – 1.

POSLANIČKA/ ZASTUPNIČKA PITANJA I INICIJATIVE

Predsjedateljica je zamolila zastupnike da prva podnese svoju zastupničku inicijativu

Zastupnik Ana Babić je podnijela dvije zastupničke inicijative:

„To je inicijativa, pa ću je pročitati a vi ćete shvatiti poslije.

U nadi da ukažu na vrlo ozbiljan problem nefunkcionalne fiksulturne sale Vijeće roditelja i učenika zajedno sa direktoricom OŠ Džemaludin Čaušević su me pozvali da ih posjetim i da pronademo sistemsko rješenje za njihov problem. Ovoj djeci koje ću zamoliti da ustanu, je potrebno omogućiti adekvatne uvjete za realizaciju nastave iz tjelesnog i zdravstvenog odgoja a i normalan psiho-fizički razvoj. Ova škola je stara 54 godine ali nakon rata nikada nije renovirana kao što je slučaj sa ostalim školama, i izgleda kao da je stvarno iz kamenog doba. Krov je od azbestnih ploča, prokišnjava, zidovi popucali, stolarija dotrajala. I pored ovako teških uvjeta ova djeca odnosno ovi učenici postižu nevjerovatne sportske rezultate a jedina im želja da san o fiskulturnoj Sali postane njihova java. Zato vas molim uvaženi ministri, i zastupnici da se odmah izjasnimo po ovoj inicijativi, te je uputimo prema Vladi Kantona i resornom Ministarstvu. A ona glasi:

Traži se od Vlade Kantona Sarajevo i Ministarstva za obrazovanje nauku i mlade Kantona Sarajevo da se u budžetu planiraju sredstva za adaptaciju fiskulturne sale OŠ Džemaludin Čaušević. Sada ću samo nešto da uradim. Također da mi ne zamjerite, ovo srce koje su ova djeca uputila meni, ovo srce je za cijelu Skupštinu i za našeg ministra da pročita 440 djece ove škole vapi i moli da im se pomogne. Hvala na razumijevanju. Ministre ja ću vam ovo uručiti. O ovoj inicijativi ćemo se izjasniti kasnije. Ja vjerujem da ste pogledali ovu djecu njihove medalje su teže nego što oni imaju kila pa ja vjerujem da ćete to sve uvažiti. Hvala vam što ste došli i bili prisutni.

Ja također imam jednu inicijativu koju upućujem u više ministarstava a ona se tiče korištenja nargile kod maloljetnih osoba. Došlo je do poražavajućih podataka da više maloljetnika pa već od 12 godina skoro svakodnevno konzumira nargilu a pri tome nisu informirani o brojnim štetnim posljedicama konzumiranja iste. Obrazloženje za ovu inicijativu je došlo isključivo zbog konzumiranja nargile koja se javlja u čestoj pojavi, a ona izaziva glavobolje, manjak koncentracije, veliku bezvoljnost a to se odražava na njihove rezultate u školi na fakultetu.

Mladi postaju vrlo napeti što nerijetko prelazi i u agresivnost a zabilježene su i ozbiljne posljedice depresije. Zato molim odgovorne institucije, vlasti, da ovaj problem smatraju visoko ozbiljnim te da se poduzmu mjere kako bi javnost bila prvenstveno educirana o svemu ovome, a plašim se da će ovaj problem izmaći kontroli, ako ne bi smo malo više obratili pažnje na to. Zato treba pojačati inspekcijski nadzor i svakako od strane Ministarstva unutarnjih poslova, ministarstva zdravlja i ministarstva obrazovanja nauke i mladih. Eto toliko. „

Zatim je predsjedateljica davala riječ prijavljenim zastupnicima.

Zastupnik Mario Vukasović podnio je zastupničku inicijativu i postavio pitanje:

„Moja inicijativa današnja se tiče uvrštavanja i usvajanja Finansijskog izvještaja JU Studentski centar Sarajevo za 2014 i 2015 godinu na iduću sjednicu Skupština Kantona Sarajevo i zamolio bih da se kolege zastupnici poslije izjasne o ovoj inicijativi. Ovo je već peti mjesec u nizu kako se bavim problematikom Studentskog centra te pitanje potencijalnog kriminala u toj ustanovi. Neke stvari se jesu pokrenule, Tužilaštvo se jeste uključilo u kompletnu priču, no ono što svakako zabrinjavanja jeste potpuni izostanak bilo kakve reakcije Vlade Kantona Sarajevo. Vlada Kantona Sarajevo je prije tri mjeseca imenovala vd UO i NO u ovoj ustanovi i taj UO i NO za ova tri mjeseca nije učinio apsolutno ništa. Mandat im je istekao nije imenovan novi direktor, nije nam dostavljen Finansijski izvještaj a podsjećamo da još uvijek nismo dobili ni Finansijski izvještaj za 2014 godinu. U međuvremenu uposlenici Studentskog centra primoravaju se da potpišu podršku direktoru pod prijetnjom otkaza. Svakodnevno trpe mobing na poslu, poziva ih se na informativne razgovore, a studente koji su se usudili usprotiviti direktoru Kadriću odstranili su iz studentskih domova. Ovim putem podnosim inicijativu da se na idućoj sjednici Skupština Kantona Sarajevo uvrsti tačka dnevnog reda „Usvajanje finansijskih izvještaja i apelujem da odmah na idućoj sjednici Vlada imenuje novi vd UO i NO ili da pokrene proceduru raspisivanja konkursa i imenovanja redovnog UO i NO. direktor Kadrić već 16 godina na toj poziciji. Direktor Kadrić je 16 godina u minusu i ukupan dug ove ustanove za vrijeme njegovog mandata je narastao na između 6 i 7 miliona KM. Ako ovo nije dovoljan razlog za smjenu ja ne znam stvarno šta jeste. Dok domovi propadaju direktor gradi teniske terene u iznosu od skoro 200 000 KM a da za njih nema građevinsku i urbanističku suglasnost, te nema dozvolu Vlade Kantona Sarajevo koju je morao pribaviti pri ovoj investiciji. Ovdje se radi o tipičnom primjeru ne domaćinskom upravljanju jednom ustanovom. Vrš se gotovinske isplate sa blagajne studentskog servisa što je striktno zabranjeno. I ovdje se radi o iznosima od više stotina hiljada KM koje su isplaćene s ove blagajne. Zamolio bih pismeni odgovor na tražena pitanja i inicijativu, ali bih i isto tako zamolio premijera Konakovića da nas izvijesti usmeno šta Vlada namjerava uraditi po ovom pitanju te kakav je njegov stav po ovom pitanju. S obzirom da nam nije dostavljeno prošli put ponovo tražim da nam se dostavi spisak imena i prezimena svih studenata koji su radili ili rade u Studentskom centru a koji su prijavljeni preko studentskog servisa. Također molim da nam se dostavi osnivački akt servisa, te ovaj put molim Vladu Kantona Sarajevo da oni to učine i proslijede“.

Zastupnik Slaviša Šućur je postavio zastupničko pitanje:

„Moje pitanje je za ministricu zdravstva u Kantonu Sarajevo. Da li postoji, i ako postoji, ko je izdao instrukciju o ne davanju uputnica za liječe u Opštoj bolnici u Sarajevu?

Obrazloženje:

Kada je njegovateljica moje majke otišla u Dom zdravlja da traži uputnicu za moju majku da ide na liječenje u Opštu bolnicu rečeno je da postoji instrukcija da se ne daju uputnice za Opštu bolnicu. Na moje insistiranje da dobijem tu instrukciju u pisanom obliku ona je na

kraju dobila tu uputnicu. Dakle kada je rečeno na čiju se majku odnosi i da ja insistiram da mi se pismeno dostavi takva instrukcija očito da se nešto promijenilo. Mislim da se radi o jednoj vrlo opasnoj i ružnoj pojavi da neko pokušava naokolo nekim drugim putevima da pokaže kako Opšta bolnica ne treba, kako nema nikakvog smisla i to radi preko leđa pacijenata što mislim da je jako loše. Dakle, zaista želim da ministrica mi odgovori da li postoji ili ne postoji, ako ne da se to jasno i javno kaže da ne postoji ta vrsta zabrane. Čuo sam od drugih ljudi također da su imali slične iskustva po ovom pitanju. „

Zastupnik Segmedina Srna Bajramović je izrazila nezadovoljstvo odgovorom na prethodno postavljeno pitanje i postavila dva nova zastupnička pitanja:

„Najprije, s obzirom da nisam zadovoljna odgovorom na pitanje upućeno MUP-u Kantona Sarajevo, a vezano za veliki broj inozemnih kaznenih listova, molim da se isto pitanje kao i odgovor MUP-a prosljedili Ministarstvu pravde i Ministarstvu sigurnosti BIH kojima upućujem i dodatno pitanje. Kako se postupa kakva je praksa, i kakve su obaveze policijskih agencija u BIH kada su u pitanju inozemni kazneni listovi za osobe koje su rođene u BIH, konkretno na području jednog od Kantona u FBiH? S obzirom da sam iz odgovora MUP- a Kantona Sarajevo dobila informaciju da je Ministarstvo sigurnosti nadležno za prevođenje određenih inozemnih kaznenih listova, molim odgovor istog ministarstva na pitanje Koliko su dosada dobili zahtjeva od strane konkretno MUP-a Kantona Sarajevo i za koliko osoba, odnosno kaznenih listova? Uz podsjećanje na obavezu preuzetu u vrijeme liberalizacije viznog režima kada je jedan od uvjeta bilo i uvođenje elektronske baze podataka, među kojima je i ova, a za čiju namjenu je dodijeljena i značajna elektronska oprema od Direkcije za koordinaciju policijskih tijela tražim odgovor je li MUP Kantona Sarajevo ispunio uvjete u tom smislu, tj je li baza inozemnih kaznenih listova stavljena u rad u punom kapacitetu?

I još jedno pitanje imam. Tražim usmeni odgovor od ministra privrede i i ministra kulture i sporta zašto je direktor ZOI'84 Midhat Hubijar strelište u Zetri zatvorio za potrebe streljačkih klubova koji se takmiče po olimpijskom programu i pravilima Svjetske streljačke federacije uprkos Protokolu o korištenju koji je potpisan u januaru. Podsjetit ću vas na poštivanje memoranduma o preuzimanju Olimpijske dvorane Zetra koji je potpisan između MOK-a, OK BIH, Vijeća ministara i Kantona Sarajevo a koji definiše obavezu da vrhunski sportisti i klubovi koriste Zetru pod specijalnim uslovima. Da li treba dozvoliti jednom pojedincu da narušava ugled našeg Kantona ne poštivajući i ne pridržavajući se čak ni Međunarodnog sporazuma. Dalje, molim odgovor na pitanje o dinamici provedbe Sanacionog plana koji je definisao obavezu izmirenja doprinosa do šestog mjeseca 2014, a danas imamo situaciju da nisu plaćeni od 2013. Radnici su na minimalcu koji im se u slučaju bolovanja umanjuje za 20%. O izradi sistematizacije također tražim informaciju iz koje je potpuno izolovan Sindikat, stari radnici nosioci prvenstava nekad, sada su marginalizirani, ne radi sistem vatro dojave u Zetri i čitav niz drugih alarmantnih podataka koji dovode u pitanje funkcionisanje ZOI 84. I na kraju, od vas tražim da naložite direktoru da strelište u Zetri hitno stavi na raspolaganje vrhunskom sportu, kako djeci tako i vrhunskim takmičarima. A problema koji ima na relaciji Ministarstvo ZOI 84 treba da se rješavaju ali ne preko sportista“.

Zastupnik Rasim Smajić postavio je jedno zastupničko pitanje:

„Moje zastupničko pitanje može se formulisati kao i informacija, a odnosi se na bivše Ministarstvo za stambena pitanja. Naime, interesuje me Odluka o dodjeli stanova mladima pod povoljnijim uslovima. Znači Odluka je donešena u prošlom mandatu. Jesu li stanovi dodijeljeni , pod kojim uslovima i da li se isplaćuju ti stanovi? Molim da mi se dostavi odluka i spisak osoba kome su dodijeljeni stanovi pod povoljnijim uslovima. Molim odgovor u pisanoj formi“.

Zastupnik Dževad Rado postavio je jedno zastupničko pitanje i podnio jednu zastupničku inicijativu:

„Ja ću postaviti jedno zastupničko pitanje ministarstvu za rad socijalnu politiku, raseljena i izbjegla lica Kantona Sarajevo. Kada se očekuje završetak zgrade na Šipu za smještaj interno raseljenih lica sa područja Općine Centar? I zašto zgrada čija izgradnja za ove svrhe započeta 2011 godine još nije završena?

Obrazloženje:

Grupa građana sa statusom interno raseljenih osoba na području Općine Centar, njih 11, na čelu sa gđinom Saović Mehmedom obratila se s molbom da postavim ova pitanja u cilju konačnog rješavanja njihovog stambenog problema. Izgradnja zgrade na lokaciji Šip kod džamije 2011 putem izvođača radova započelo je Ministarstvo za rad, raseljena i izbjegla lica u Kantonu Sarajevo. Zgrada je imala namjenu za smještaj interno raseljenih lica sa područja Općine Centar i trebala je brojati ukupno 24 stana. Podignuta su dva sprata zgrade a sa daljnjom izgradnjom stalo se 2013 godine i do danas se gradnja nije nastavila. I sada da ne čitam dalje, interesuje me kada i na koji način će ovaj problem biti riješen?

Imam jednu sada inicijativu. Upravo zbog vremena sam skratio nisam čitao do kraja. Pokrećem inicijativu za izmjenu člana 17 tačka 4 Zakona o porezu na promet nepokretnosti i prava Kantona Sarajevo službene novine 23/5, 26/6 i 41/08. poreska oslobođanja iz člana 17 tačka 4 navedenog Zakona između ostalog propisuje da se za boračku populaciju uslov za oslobođanje plaćanja poreza kada prvi put i jedini put rješavaju stambeno pitanje neprekidan boravak u OS 24 mjeseca za vrijeme agresije, tj u periodu od 92 zaključno sa 31.12.1995 godine.

Obrazloženje: ovaj isti Zakon u nekim kantonima je povoljniji za borce, pa tako ukazujem na primjer u ZDK, gdje njihov Zakon propisuje da je za poreska oslobođanja za boračku populaciju potreban kraći boravak u OS neprekidno 12 mjeseci u periodu 1992 do 31.12.1995 godina“.

Zastupnik Pleho Haris je pročitao zahvalnicu:

„Ja danas nemam poslaničkog pitanja ali imam potrebu da pročitam jednu podsjetnicu ili zahvalnicu koja glasi:

Na današnji dan 30.03.1992 godine otvorena je prva kuhinja u Starom Gradu koja je osnovana radi izbjeglica i socijalno ugroženih građana koja je prerasla u jednu veliku humanu instituciju koja i danas hrani socijalno ugrožene i bolesne građane Kantona Sarajevo. Naime, na današnji dan, 1992 godine gđa Zilha Šeta poznatija kao tetka Zilha skuhala prvih 180 obroka i danas, nakon 24 godine ova humana institucija radi u punom kapacitetu. Danas tetka Zilha sa svojim saradnicima dnevno skuha 1024 obroka i podijeli 240 paketa u toku mjeseca pretežno demobilisanim borcima. U ime Kluba BOSS Nermin Bjelak želim da čestitam 24 godine postojanja i rada ove humane organizacije i da se zahvalimo tetki Zilhi i njenim saradnicima na dugogodišnjem radu i pomoći gradu i građanima Kantona Sarajevo. Također se zahvaljujemo svim donatorima kao i Vladi Kantona Sarajevo po svim opštinama koje su pomagale rad ove velike humanitarne institucije. Nadam se da ćemo u budućnosti još više pomagati i imati razumijevanja za ovakve humanitarne organizacije“.

Zastupnik Mersiha Mehmedagić je postavila zastupničko pitanje:

„Ja za danas imam zastupničko pitanje koje upućujem Vladi Kantona Sarajevo i Ministarstvu za boračka pitanja, a koje glasi: Molim Ministarstvo za boračka pitanja da mi odgovori koje aktivnosti je poduzelo ili planira poduzeti kako bi se sistemski riješio problem zapošljavanja djece šehida, poginulih, umrlih i nestalih boraca, RVI, dobitnika ratnih priznanja i odlikovanja, ratnih vojnih zarobljenika i demobilisanih boraca. Koji su efekti dosadašnjih

aktivnosti te koliko ima nezaposlene djece, gore navedenih kategorija po općinama u Kantonu Sarajevo.

Obrazloženje je sljedeće: porodice navedenih kategorija se često javljaju sa pritužbama da se prilikom zapošljavanja ne poštuje Zakon o dopunskim pravima boraca Kantona Sarajevo. S obzirom da se radi o djelu lica zaslužnih u odbrambeno oslobodilačkom ratu koja pri tome pripadaju i socijalno ranjivijoj kategoriji društva, smatram da Vlade i resorno Ministarstvo trebaju sačiniti strategiju zapošljavanja ovih kategorija sa određenom dinamikom a na osnovu tačnih podataka o broju nezaposlenih po općinama, kako bi se kroz programe zapošljavanja osigurala dosljedna primjena člana 23 navedenog Zakona“

Zastupnik Amel Mekić je podnio dvije zastupničku inicijativu i postavio zastupničko pitanje:

„Ovim putem pokrećem inicijativu da se u navedenom prijedlogu otvori pozicija za podršku povećanja nataliteta u Kantonu Sarajevo što bi se najviše odnosilo na finansiranje postupka vanjajne oplodnje ženama. U nekim kantonima su takve procedure već zakonski uređene. Naime, suočeni smo sa činjenicom da se u cijeloj BIH, pa i Kantonu Sarajevo dolazi do alarmantnog pada nataliteta što se osjeti po znatno manjem broju upisane djece u osnovne i srednje škole. Ove godine u osnovnim školama ima manje 430 djece, otprilike jedna osnovna škola. Prema zvaničnim statistikama imamo zabrinjavajuće podatke da se u BIH godišnje rode 83 bebe na 10.000 stanovnika, te prema natalitetu BIH zauzima posljednje mjesto u regionu. Također bih odmah postavio pitanje uvaženoj ministrici, gđi Zlhi Ademaj da mi odgovori sa kolikim bi se sredstvima moglo raspolagati u rebalansu?

Za premijera, gđina Dinu Konakovića i ministru obrazovanja gđina Elvira Kazazovića da uzmu u razmatranje i da počnu pripremati sredstva za izgradnju fiskulturne sale Srednje zubotehničke škole. Ako treba obrazloženje ja sam tu.

I kao predsjednik Komisije za kulturu i sport tražim hitan sastanak i odgovor direktora, ministra, i Vlade u vezi KJP ZOI 84, Olimpijski centar Sarajevo u kojoj se sve više vrši redukcija korištenja dvorana vrhunskom sportu, od hokeja, streljaštva također na Bjelašnici je bilo klubovima otežan rad i naravno da se pozove Sindikat“.

Zastupnik Zvonko Marić je izrazio nezadovoljstvo odgovorima na prethodno postavljena pitanja, te postavio novo zastupničko pitanje:

„Prije svega, samo da se osvrnem na odgovore iz ranijih ciklusa postavljenih pitanja posebice se to odnosi na ministra privrede. Ja mislim da je ono parodija od odgovora na zastupnička pitanja i molio bih da se to uozbilji po ko zna koji put. Ja sam jasno postavio pitanje ko je i koliko dobio poticaja poimence brojem itd. poljoprivrednog poticaja i stočnih grla. Ni jedne cifre nema nego preporučuje da ja ako imam neka saznanja da dostavim tamo. Pa ne pripadam ja istražnim organima i ne želim to da radim. Ja sam tražio jasno i prema tome da mi se odgovara. Siguran sam da je prof Šabić profesor da bi oborio studenta ukoliko bi mu odgovorio na onakav način na koji je meni on odgovorio. Druga stvar, također, kod odgovora, ja sam postavio pitanje za ustanovu Djeca Sarajeva, međutim vd direktor sadašnji, na takav način prostački je odgovorila da ću ja odgovoriti da ne bude da ja imam prednost javno da joj odgovaram ovdje, ali te stupidnosti koje sam pročitao u tom odgovoru govore jasno o njoj. I ja ću joj odgovoriti i pojasniti da je to sve pod mentorstvom upitnog lidera, upitnog sindikata, a iz tih upitnosti proističe i njeno imenovanje pa je i ona samim tim upitna, a iz tih upitnosti proističu još neke druge upitnosti o kojima ja ne želim ovdje da odgovorim. Dakle, odgovorit ću joj. Ona je meni poslala jelovnik. Ja sam postavio zašto mlijeka nemaju djeca devet mjeseci. Kao da je za bildere. Ja sam mislio da tu djecu dopinguje dotična direktorica.

A sada da se vratim na pitanje. Prije svega moje pitanje odnosi se na jedan slučaj jednog borca logoraša koji živi u Vogošći. Ne bih želio da mu spominjem ime zato što ja sam dostavio predmet i nadzoru za inspekciju i njegove nalaze PTSP, žena šizofreničar, djeca su siromašna u bijedi žive. Obratio sam se na jedan fin način da ne bi ovako medijski, inspektorici Čaušević i čini mi se Selmanović. One su mi objašnjavale da je razlog za tu septičku jamu koju im je čovjek, ustvari nije to septička jama, nego septički sadržaj koji u njihovo dvorište maltene dolazi ili pred kućom. U toj svoj bijedi, dakle i nisu mogući efikasni, čak i gđa Čaušević je potpisala izvršno rješenje 2012 godine. 2012 godine, dakle molim vas samo da završim ovo. Ili nije u stanju da ga izvrši. To je sramota. Šta će onda. Kaže opstruira gospodin koji je inspektor pod zaštitom pod mentorstvom načelnika općine Vogošća itd. Pa ne treba nam inspekcija onda. To je sramota i za nas, za izvršne organe, za Vladu, za resorno Ministarstvo, za skupštinu. Ako nije u stanju. Šta treba čovjek, zbog septičke jame da se žali sudu u Strazburu. Sramno. I prema tome želim da mi se to odgovori prije nego što se desi bilo kakva tragedija i onda da ne bude da se nije znalo o čemu je riječ“.

Zastupnik Muhamed Kozadra je pokrenuo jednu zastupničku inicijativu:

„Želim pokrenuti inicijativu za obezbjeđenje dodatnih sredstava u budžetu Kantona Sarajevo za razvoj poticajne industrijske proizvodnje. Kao što vam je poznato u Kantonu Sarajevo postoji stare industrijske zone i novoformirane industrijske zone za koje lokalna zajednica nema dovoljno sredstava da obezbijedi i da u punom kapacitetu ih stavi u funkciju. U cilju poticaja novog upošljavanja, prevashodno u proizvodnji, predlažem da se izdvoje dodatna sredstva u rebalansu za 2016 i u budućim budžetima narednih godina. Poticaji bi se odnosili na sljedeće: prilikom izgradnje proizvodnih objekata i novog upošljavanja da investitori budu oslobođeni plaćanja rente i uređenja građevinskog zemljišta. Da općine donesu svoje propise u kojima će definirati sve elemente za ostvarivanje ovog prava a ono bi se odnosilo na namjenu gradnje, mjesto gradnje, vrijeme potrebno za izgradnju, broj novo uposlenih, ograničenja u mogućoj prodaji izgrađenog objekta i promjeni namjene kao i garancije za poštivanje korištenja ovog prava. Navedena sredstva prevashodno bi potrebno bilo usmjeriti u vangradske općine koje imaju manje budžete ali se na njihovom području i planski lociraju i proizvodni programi, što je logično da centralni dijelovi grada Sarajevo budu rasterećeni ovih sadržaja. Ovu poticajnu mjeru imaju mnoge lokalne zajednice koje daju odlične rezultate. Imamo primjer Goražda, Tešnja, Jelaha itd. Stoga predlažem da podržimo ovu inicijativu.“

Zastupnik Predrag Kojović je podnio dvije zastupničke inicijative:

„Ja imam dvije inicijative. Jedna se tiče je upućena Ministarstvu zdravstva. I malo je tehnička, ali mislim da ministra će znati odlično o čemu ja govorim. Naime, mi sada primjenjujemo kod određenih oboljenja neophodno je upotrijebiti terapijsku plazmu, jedan krvni proizvod do koga se dolazi, mi trenutno dolazimo centrifugalnom filtracijom dok postoji, odnosno dolazimo membranskom filtracijom a postoji jedan drugi metod. Taj metod je daleko jeftiniji i uspješniji ali zahtijevao bi određena ulaganja u smislu medicinskog kadra, kratkoročna u Zavod za transfuziologiju. Razlika u cijeni je znači metoda koju sada mi koristimo košta oko 1400 KM po pacijentu, metoda bi koštala, kada bi smo usvojili ovu uspješniju i jeftiniju koštala bi oko 450 KM, ali najvažnije je to što je ona de fakto uspješnija i može se primjenjivati u više bolesti. Ja ću u pismenom obliku. Rekao sam da je malo tehnički komplikovana, uputiti Ministarstvu zdravstva. Znam da je ministrica informisana i zna tačno o čemu govorim.

Druga inicijativa se tiče nečega što nam je Vlada Kantona Sarajevo odnosno svojevremeno poslanik/zastupnik Konaković u prošlom mandatu obećao a to je Zakon o utvrđivanju imovine, porijekla imovine izabranih i imenovanih dužnosnika u Kantonu Sarajevo koji je

kao što znamo bio izostavljen iz plana i programa Skupštine za ovu godinu a onda uvršten na intervenciju da bude u septembru, onda je sa septembra pomjeren da će biti nacrt u martu i evo danas, kao što vidimo, ipak se nije našao na dnevnom redu. I pošto mi više volimo da radimo nego da pričamo o borbi protiv korupcije i kriminala, mi pokrećemo inicijativu za donošenje ovog zakona. Zakon smo napisali, nacrt i predali smo“.

Zastupnik Bibija Kerla je postavila dva zastupnička pitanja:

„Ja imam danas dva pitanja. Prvo moje pitanje se odnosi na zagađenje vode sa izvora Bačići. Ustvari ovih dana me zvalo puno građana i oni su se žalili da se u vodi nalazi veliku koncentraciju hlora i pitaju da li je stvarno voda toliko zagađena što se tiče Bačića da bi oni morali da gledaju bijelu vodu umjesto tekuće normalne vode, pitke vode i zato molim danas jedan usmeni odgovor od ministra. Dalje moje drugo pitanje se odnosi ministrici za socijalnu politiku šta je učinjeno po pitanju zbrinjavanja socijalno ugroženih građana koji nemaju osnovne uslove života? Tražim da se primjenjuje pakt o socijalnim, kulturnim i ekonomskim pravima građana, članovima od 9-13 koji kažu ustvari da je ovaj Pakt po važnosti iznad Ustava, tj Aneksa IV Dejtonskog sporazuma, gdje kantoni moraju zbrinjavati svoje građane, dati im krov nad glavom, dati im doručak, ručak i večeru, obuću i odjeću i besplatno školovanje. Uprkos pričama o uspješnom povratku imovine, preostala su ozbiljna stambena pitanja s obzirom da značajan broj osoba traži alternativni oblik javne stambene pomoći. Međutim, takva pomoć nije lako dostupna najugroženijim kategorijama kao što su porodice s jednim roditeljem, starije osobe, žene, djeca, osobe s invaliditetom. Pošto ne postoji zakonski sistem javni strateški mehanizam koji reguliše kategoriju o dodjeli pomoći dešava se da ugroženi pojedinci i porodice uopšte nisu stambeno zbrinute i potrebna je hitna pomoć opštinskih i kantonalnih organa vlasti. Tražim da se ovom problemu posveti daleko veća pažnja kako bi građani Sarajeva konačno osjetili da bar neko brine o njima“.

Zastupnik Semir Halilović je postavio dva zastupnička pitanja i jednu inicijativu:

„Ja ću svoja dva pitanja, jedno je za Tužilaštvo Kantona Sarajevo, a drugo je za Ministarstvo pravde uložiti pismeno da ne oduzimam vrijeme. Samo ovaj put odgovore koje sam dobio od ministarstava, pa redom: privrede, finansija, i zdravstva su ispod svakog nivoa intelektualnog, ispod merituma onoga što se pita. Znači, ja ću ponovo postaviti pitanja za sva tri ministarstva, odnosno jedna inicijativa, dva pitanja, iz prostog razloga što nevjerovatno je da sva tri ministarstva odgovaraju na pitanje koje im nije postavljeno, a ne odgovore na ono koje im postavljeno. Bio bi red stvarno Vlada da radi svog poštovanja, radi digniteta same Vlade da odgovara na ono što ih se pita, a ne na ono što ih uopšte ne pita“.

Zastupnik Edin Forto je postavio dva zastupnička pitanja:

„Ja imam jedno pitanje koje želim ustvari ponoviti gđinu ministru Čedomiru Lukiću, ministru prostornog uređenja. Prije dvije sjednice sam postavio pitanje vezano za Zakon o upraviteljima zgrada. Znači taj Zakon u skladu sa novo-donesenim Zakonom o stvarnim pravima pitanje je koliko je on uopšte zakonit. On je praktično stavljen van snage. Ja sam to bolje obrazložio na pretprošloj sjednici. Na prošloj sjednici u konsultacijama sa gđinom ministrom rekao da će biti to odgovoreno, možda nije dobio. Možda skupštinske službe trebaju provjeriti da li dobio to pitanje. Vrlo je bitno, ovo je pitanje koje se tiče velikog broja građana. Veliki je broj pritužbi građana koji imaju zajedničko stanovanje na upravitelje koje je samo Ministarstvo neke od njih pokrenulo je tužbe koje imaju iznose od više stotina hiljada maraka. Znači vrlo je bitno da ovo razriješimo što prije kako bi mogli učestvovati u javnoj raspravi za ovaj Zakon. Znači ovo je ponovljeno pitanje.

E sada bih još htio pitati gđina ministra Hasanspahića ministra komunalne privrede i infrastrukture možemo li dobiti pregled uplata za vodne naknade koje se uplaćuju u Budžet Kantona Sarajevo po osnovu federalnog i kantonalnog Zakona o vodama? Vrlo je bitno da vidimo kako se ova namjenska sredstva troše, zbog problema vodosnadbijevanja u kantonu. Ako možete da mi dostavite to za posljednjih pet godina, mislim da će koristiti ta analiza i ovoj Vladi u pripremama za naredne budžete. Također bi pokrenuo inicijativu prema ovom Ministarstvu da pokrene zajedno sa Vladom stavljanje u rad Vlade, da pokrenemo sjednicu vanrednu za vodozaštitnu zonu koju je tražilo opštinsko vijeće Ilidža. Ne znam gdje smo stigli s tim. Dobili smo svi materijale, svi skupštinski zastupnici. Neki od nas smo bili na toj sjednici vodozaštitna zona je goruće pitanje, mislim da se ova Skupština i ova Vlada ne odnose domaćinski prema ovom pitanju. A vodozaštitna zona je 90% svoje površine na opštini Ilidža. „

Zastupnik Sabina Ćudić je podnijela tri zastupničke inicijative:

U skladu sa prijašnjim inicijativama Naše stranke, a vezano za prava osoba sa invaliditetom u Kantonu Sarajevo, predlažemo dvije inicijative koje se tiču također kretanja osoba sa invaliditetom u Kantonu Sarajevo. Prva inicijativa se tiče za izmjene Uredbe o subvencioniranju troškova prevoza u javnom gradskom saobraćaju na području Kantona Sarajevo kojim će se omogućiti da slijepa i slabovidna lica mogu ostvariti pravo neovisno o članstvu u Udruženja slijepih i slabovidnih lica Kantona Sarajevo a na osnovu dokaza o stepenu invaliditeta. Da pojasnim o čemu se radi, dobili smo upite i zahtjeve značajnog broja slijepih i slabovidnih lica u Kantonu Sarajevo koja ne mogu pristupiti, odnosno ne mogu dobiti dozvole za kupone i dozvole za kretanje u javnom saobraćaju bez evidencije u njihovim udruženjima, što je naravno nije u skladu sa europskom praksom. Ne postoji nikakav razlog zašto bi smo uslovljavali da osoba onda plaća članarinu tim udruženjima, odnosno da legalizujemo svojevrstan monopol udruženja nad pravima osoba sa invaliditetom. Pa vas molim da ovu inicijativu i usvojite.

Zastupnička inicijativa broj 2. tiče se također kretanja osoba sa invaliditetom u Sarajevu i tiče se konkretno subvencioniranja taksi prevoza za lica korisnike kolica, te slijepa i slabovidna lica sa fokusom na dijelove grada koji nisu povezani adekvatnim javnim prevozom u smislu povezanosti i učestalosti linija. Odnosno nisu opremljeni u svrhu primanja putnika koji su korisnici kolica. Kao što znamo većina vozila taksi prevoza i javnog prevoza nisu osposobljena za osobe, posebno s kolicima, kao i slijepa i slabovidna lica pa bi smo sa ovom inicijativom najavili i zakonske izmjene koje ćemo predlagati u budućnosti a tiču se da zapravo vozila taksi vozila koja su osposobljena za upotrebu osoba sa invaliditetom ne ulaze u ono brojčano ograničenje registrovanih taksi vozila u Sarajevu kako bi smo pružili poticaje onim taksi prevoznicima koji pružaju usluge osobama sa invaliditetom da to i dalje čine.

I konačno, ispred Kluba Naše stranke, imamo inicijativu koja je nešto opširnija i neću je sada detaljno obrazlagati ali se tiče zapravo kreiranja baze podataka, katastra odgojno obrazovnim objektima u Kantonu Sarajevo koji bi nam pružilo detaljan uvid u stanje. Znači broj škola, stanje u školama, izgled škola i što je najvažnije, neophodne popravke i neophodne izmjene na zgradama osnovnih i srednjih škola u Kantonu Sarajevo. Na osnovu te baze podataka onda bi smo mogli da pravimo i ozbiljnije planove vezano za rekonstrukcije škola i da steknemo jednu jasniju sliku o potrebama obrazovnih institucija u Kantonu Sarajevo. Sve tri smo naravno predali na protokol. Detaljnije su tamo obrazložene i s tim u vidu hvala.

Zastupnik Eldar Čomor je postavio jedno zastupničko pitanje i uputio inicijativu:

„Pokrećem pitanje i inicijativu prema Ministarstvu finansija i Ministarstvu privrede Kantona Sarajevo da se dostavi ugovor o ustupanju bankarskih poslova broj:05-05-14-1157/99 koji je

23.09.1999 zaključen između ministarstva finansija privrede Kantona Sarajevo i Intesa Sanpaolo banke dd BIH ranije UPI banka. O razlozima ćemo govoriti kada dođe ovaj ugovor. I imam inicijativu prema Ministarstvu saobraćaja Kantona Sarajevo da se na putu M17 na prelazu između naselja Garovci i Donji Hadžići izradi i izgradi kvalitetno stručno i tehnički prihvatljivo rješenje pješačkog prelaza na navedenoj lokaciji.

Obrazloženje:

U devetom mjesecu ako Bog da očekuje se početak rada nove OŠ Hadžići u Hadžićima. OŠ je na lijevoj strani krećući se putem M17 prema Mostaru, naselje Garovci je na desnoj strani. I ovo naselje nema riješeno pitanje prevoza djece, odnosno učenika te su oni primorani da idu pješke. Sada će biti primorani da prelaze preko puta M17 do škole. Na navedenoj lokaciji ima ka označen pješački prelaz ali je totalno nesiguran, jer se vozači kreću velikim brzinama i ova lokacija je poznata po velikom broju saobraćajnih nesreća pa čak i slučajeva sa smrtnim posljedicama učesnika u saobraćaju“.

Zastupnik Mirza Čelik je podnio jednu zastupničku inicijativu:

„Ja podnosim inicijativu, odnosno tražim od Ministarstva saobraćaja, tj Direkcije za ceste Kantona Sarajevo da mi dostavi informaciju koliko ima nelegalno postavljenih bilborda na području Općine Ilidža, ili da mi dostave koliko ima izdatih odobrenja za postavljanje bilborda u putnom pojasu na području Općine Ilidža.

Obrazloženje:

Na zahtjev građana općine Ilidža podnosim ovakvu inicijativu sa zahtjevom da se isti nelegalni bilbordi uklone kako bi građani imali bolji pregled na raskrsnicama jer nelegalno postavljeni bilbordi ometaju učesnike u saobraćaju“.

Zastupnik Sead Bukva postavio je jedno zastupničko pitanje:

„Moje jedno pitanje se odnosi Ministarstvu za boračka pitanja, ustvari pitanje za Fond za izgradnju i očuvanje grobalja šehida i poginulih boraca. Zašto u Monografiji koju je izdao ovaj Fond sa svim slikama i opisima šehida, mezarja i spomen obilježja nema i spomen obilježja Brezovača, Općina Hadžići? Iako je na tom spomen obilježju ukopano troje boraca i to šehida: Adnan Došlić, poginuli borac Čedomir Domuz i poginula pripadnica za posebno namjene Zulfikar Milica Marković. Samim time postavlja se pitanje kako i ko održava spomenuto spomen obilježje. Kako imamo informaciju spomenuto spomen obilježje održavaju sami građani i rodbina poginulih uz pomoć donacija građani i firme koje su uredili i ogradili spomenuto spomen obilježje“.

Zastupnik Neira Avdibegović je postavila dva zastupnička pitanja:

„Ja za danas imam dva zastupnička pitanja. Oba se tiču najranjivije kategorije stanovništva našeg društva, odnosno osoba sa invaliditetom. Prvo pitanje upućujem Ministarstvu zdravstva Kantona Sarajevo. Kada će se konačno pristupiti rješavanju problema stomatoloških usluga za osobe sa težim invaliditetom, prvenstveno za djecu sa posebnim potrebama. Naime, stomatološki zahvati kod djece sa posebnim potrebama rade se pod općom anestezijom. Popravak zuba pod općom anestezijom u BIH trenutno se radi samo u Mostarskom Karitasovom centru Sveta obitelj gdje je obučen tim stomatologa i anesteziologa i obavlja zahvate ove vrste. Kako je ovo za sada jedina ustanova tog tipa u BIH, liste čekanja su naravno sve duže i duže. Trebinje i Banjaluka su u prošloj godini pokrenuli rješavanje ovog problema i to uglavnom nevladine organizacije sa predstavnicima zdravstvenih usluga. KCUS u saradnji sa Stomatološkom klinikom prema mojim saznanjima ima potrebnu opremu ali se iz nekog razloga ovi zahvati ne obavljaju. Dakle, roditelji čija su djeca zdrava imaju zagarantovanu zdravstvenu uslugu, a roditelji djece sa posebnim potrebama zaštitu koja im je

zakonom zagarantovana, ne mogu iskoristiti. Ovoj djeci je to pravo oduzeto. Društvo je i dalje gluho i nijemo na ovaj problem. Stoga smatram da je krajnje vrijeme da se problem počne rješavati i molim odgovor da li nadležni rade na rješavanju istog koje će eventualne aktivnosti poduzeti, nadam se u što skorijem periodu.

Moje drugo pitanje odnosi se ustvari na podršku slijepim i teže slabovidnim osobama kojih, samo prema evidenciji udruženja slijepih Kantona Sarajevo u našem kantonu ima oko 420. prema Uredbi o obimu, uslovima, i načinu ostvarivanja prava osiguranih lica na korištenje ortopedskih i drugih pomagala, slijepe osobe mogu ostvariti pravo samo na tamne naočale, govorni toplomjer i bijeli štap. S druge strane recimo apsolutno nije osigurana obuka za korištenje bijelog štapa. To ne može ni približno zadovoljiti stvarne potrebe ovih osoba, koje naravno zbog težine i same vrste invaliditeta imaju velike poteškoće u organizovanju svakodnevnog života. Ovo pitanje je puno povoljnije riješeno u zemljama u okruženju pa čak i u RS-u. Stoga moje pitanje upućeno Vladi i opet Ministarstvu zdravstva kao resornom, jeste da li se poduzimaju aktivnosti sa ciljem unapređenja u ovoj oblasti kako bi se osigurali što bolji uslovi života osobama sa navedenom vrstom invaliditeta“.

Zastupnik Hamed Aljović je postavio jedno zastupničko pitanje i podnio inicijativu:

„ Moje prvo pitanje upućeno je MUP-u Kantona Sarajevo. Molim ministra MUP-a Kantona Sarajevo da mi odgovori da li su istiniti navodi objavljeni na nekim web portalima pod naslovom „Tatini sinovi pod zaštitom policije i Tužilaštva Kantona Sarajevo autima gaze građane Sarajeva“. I ako nisu da učini dodatni napore kako bi se građani Kantona Sarajevo van svake razumne sumnje uvjerali u to.

Moja inicijativa je upućena prema Ministarstvu za rad, socijalnu politiku i raseljena lica i izbjeglice Kantona Sarajevo. Podnosim inicijativu da Ministarstvo za rad, socijalnu politiku i raseljena lica i izbjeglice preduzme sve zakonske mogućnosti kako bi pomogli četveročlanoj maloljetnoj porodici Dedović iz Ilidžanskog naselja Osijek, koji žive u izuzetno teškim uslovima, bez majke i oca, da o poduzetim aktivnostima obavijesti skupštinu Kantona Sarajevo“.

Zastupnik Goran Akšamija je izrazio nezadovoljstvo ne dobijanjem odgovora na ranije postavljena pitanja, te postavio dva nova zastupnička pitanja i jednu inicijativu:

„Prvo bih želio da nešto naglasim da sam prije tri mjeseca postavio dva zastupnička pitanja, jedno se odnosilo na Ministarstvo obrazovanja i da li se šta radi na ukidanju promašaja devetogodišnjeg obrazovanja? A drugo pitanje je bilo upućeno Ministarstvu saobraćaja za regulisanje kretanja vozila, odnosno dostavnih vozila koji vrše dostavu po trgovinskim radnjama koje se nalaze u gradu i to u jutarnjim satima gdje dolazi faktički do jednog kolapsa saobraćaja. Vjerujem da odgovore na ova pitanja nisam dobio radi velikog posla Vlade oko postavljanja UO pa će se moje pitanje upravo odnositi na to iz segmenta zdravstva.

Koliko sam uspio da vidim na nekim portalima novoimenovani UO su isključivo jednonacionalni, znači bez poštivanja zakonsko pravnih akata, a također ne vidim da se tu nalaze osobe iz reda uposlenika, što se vrlo često pogrešno tumači, da su to uposlenici iz drugih ustanova a ne iz one iz koje potiču. Smatram da ovakav način imenovanja odbora, gdje se može vidjeti da se tu nalaze možda i neki ljudi koji ne zadovoljavaju potrebne kriterije a uzimajući u obzir situaciju koja je trenutno u zdravstvu i gdje se treba najozbiljnije rješavati.

Moje sljedeće pitanje je da li možemo dobiti, po nekim nezvaničnim informacijama podatke da li je budžetska inspekcija boravila u ZZO Kantona Sarajevo i da li nam ti rezultati mogu biti predloženi na ovoj Skupštini?

I treća inicijativa pošto je već bilo pokrenuto u toku ove Skupštine oko izgradnje ovih fiskulturnih sala, da napomenem da se u sličnoj situaciji nalazi i škola Safet beg Bašagić, gdje

učenici od petog razreda moraju da idu bez ikakve pratnje u FIS da bi mogli da vrše nastavu tjelesnog vaspitanja po svakakvim vremenskim uvjetima. Pa da se uzme i ova škola u obzir“.

Zastupnik Kemal Ademović je postavio dva zastupnička pitanja:

„Ja imam dva pitanja prema Vladi. Prvo pitanje, po kojoj cijeni i koje kvalitete je nabavljen mazut za potrebe Toplana u 2015 godini? I drugo pitanje, da li su nastupili, i ako jesu koje štetne posljedice korištenjem tog mazuta u grejnoj sezoni 2015/2016?

Ovo zahtijevam da mi se odgovori pismeno. A imam i jedno usmeno pitanje, tj imam pitanje na koje tražim usmeni odgovor.

Danas smo na klupama nam je podijeljena obavijest Kantonalnog Tužilaštva u vezi sa predmetom „Prečistač“. Koje je prijavila Vlada Kantona Sarajevo kako stoji ovdje da ne čitam brojeve i ne trošim vrijeme. Kaže se da „ U vezi informacije o problematici izvršenja Zaključka Skupštine Kantona Sarajevo prijavljeno djelo nije krivično djelo. I da imate pravo podnijeti pritužbu na ovu odluku Ureda tužioca Kantonalnog Tužilaštva u Sarajevu u roku od osam dana od dana prijema ovog obavještenja. Pa ja sada pitam Vladu da li je podnijela ovu pritužbu? Ili ovdje ima elemenata lažnog prijavljivanja i ovakvi i slični predmeti se koriste samo radi skupljanja političkih poena. Dakle ovdje rasprava pred kamerama itd. Kada se govori o visokim ciframa, korupciji, kriminalu itd“.

Zastupnik Safet Mešanović je podnio jednu zastupničku inicijativu:

„Dakle ja sam samo htio nekoliko rečenica da kažem, a na inicijativu školskog odbora i direktorice OŠ Džemaludin Čaušević želim da potvrdim da su svi navodi iz ovog dopisa i ove inicijative tačni, da je ovo jedna od školskih sala za tjelesni odgoj koja je, evo recimo u Opštini Novi Grad u najgorem stanju, a isto tako moram reći da je u protekloj 2015 godini Opština Novi Grad izdvojila cca 40.000 KM da bi sanirala krov same škole koji je također bio u jako lošem stanju i mislim da je krajnje vrijeme da evo Ministarstvo u saradnji sa opštinom Novi Grad, a siguran sam da će se i Opština uključiti da se sljedeće sedmice izađe na teren i da se utvrde ove činjenice i da se već iz budžeta 2016 godine nađu sredstva da se sanira krov. Ako ništa drugo, ove godine krov same fiskulturne sale“.

Premijer Vlade Kantona Sarajevo Elmedin Konaković je dao odgovore kao i pojašnjenja na neka postavljena pitanja i inicijative.

Predsjedateljica je u naglasila da se inicijative koje su podnijeli zastupnici Muhamed Kozadra i Ana Babić upućuju Vladi Kantona Sarajevo skladu sa zakonskim procedurama.

Zastupnici su podržali inicijativu zastupnika Maria Vukasovića jednoglasno.

Prešlo se na razradu druge tačke dnevnog reda.

AD – 2.

**PRIJEDLOG ZAKONA O KOMUNALNIM DJELATNOSTIMA -
(HITNI POSTUPAK)**

Predsjedateljica je podsjetila da su zastupnici dobili matarijale uz poziv za sjednicu. Ministar komunalne privrede i infrastrukture Senad Hasanspahić je podnio uvodno izlaganje. Zamolio

je prisutne da se obavi jedinstvena rasprava po tačkama dva i tri jer obuhvataju istu problematiku, a da se izjašnjava pojedinačno, što je i podržano.

Premijer Elmedin Konaković je predložio da se zastupnici ne izjašnjavaju o zakonima prije no što čuju izjašnjenje Vlade na dostavljene amandmane, što je i podržano.

Zastupnici nisu postavili pitanja a u diskusiji su učestovali: Mersiha Mehmedagić, Edin Forto, Slaviša Šućur.

Premijer Elmedin Konaković je nakon diskusija predložio da predsjedateljica da pauzu za ručak u kom periodu bi Vlada održala sjednicu i donijela stavove po predloženim amandmanima.

Predsjedateljica je dala pauzu u trajanju od jednog sata.

NASTAVAK NAKON PAUZE

Predsjedateljica je otvorila nastavak sjednice i dala uvodnu riječ premijeru Vlade Kantona Sarajevo Elmedinu Konakoviću koji je Skupštinu obavijestio o stavu Vlade po pitanju uložених amandmana na Zakon o komunalnim djelatnostima i Zakon o komunalnoj čistoći. Razmatrajući dostavljene amandmane Kluba zastupnika Naše stranke, Vlada je prihvatila amandmane I, II, III, IV, VI, amandman V je povukla Naša stranka, i nije prihvatila amandman VII. Vlada je također prihvatila i Amandman zastupnika Slaviše Šućura.

Zastupnik Edin Forto je odustao od Amandmana VII.

Predsjedateljica je potom pozvala zastupnike da pristupe izjašnjavanju po zakonima.

SKUPŠTINA JE SA 25 GLASOVA „ZA“ USVOJILA PRIJEDLOG ZAKONA O KOMUNALNIM DJELATNOSTIMA.

SKUPŠTINA JE SA 26 GLASOVA „ZA“ USVOJILA PRIJEDLOG ZAKONA O KOMUNALNOJ ČISTOĆI.

Prešlo se na razmatranje četvrte tačke:

AD – 4.

**PRIJEDLOG ZAKONA O IZMJENAMA I DOPUNAMA ZAKONA O TAKSI PRIJEVOZU U KANTONU SARAJEVO
(HITNI POSTUPAK)**

Zastupnici su Prijedlog zakona dobili uz poziv za sjednicu.

Ministar saobraćaja, Mujo Fišo, podnio je uvodne napomene i naglasio da je Ministarstvo djelovalo amandmanski na Zakon s ciljem poboljšanja predloženih rješenja.

Pitanje je postavio zastupnik Mario Vukasović.

Odgovore na postavljena pitanja je dao ministar Mujo Fišo.

Nadalje nije bilo prijavljenih za pitanja ili diskusiju, te je predsjedateljica pozvala prisutne na izjašnjavanje.

SKUPŠTINA JE SA 28 GLASOVA „ZA“ DONIJELA ZAKON O IZMJENAMA I DOPUNAMA ZAKONA O TAKSI PRIJEVOZU U KANTONU SARAJEVO.

Peta tačka dnevnog reda:

AD – 5.

PRIJEDLOG ODLUKE O DAVANJU SAGLASNOSTI NA FINANSIJSKI PLAN ZAVODA ZDRAVSTVENOG OSIGURANJA KANTONA SARAJEVO ZA 2016. GODINU I ODLUKU O IZVRŠAVANJU FINANSIJSKOG PLANA ZAVODA ZDRAVSTVENOG OSIGURANJA KANTONA SARAJEVO ZA 2016. GODINU

Zastupnici su dobili Prijedlog odluke ste uz poziv za sjednicu.

Ministrica zdravstva Zilha Ademaj je podnijela uvodno izlaganje u ime predstavnika Predlagača.

Pitanja su postavili zastupnici: Sabina Ćudić, Segmedina Srna Bajramović, Predrag Kojović, Rasim Smajić.

Premijer Elmedin Konaković i ministrica Zilha Ademaj dali su odgovore na postavljena pitanja.

Replike na odgovore su uložili zastupnici: Predrag Kojović, Mirsad Pindžo, Sabina Ćudić, a odgovore na replike je dao premijer Elmedin Konaković.

Predsjedateljica je potom otvorila diskusiju u kojoj su učestovali zastupnici: Goran Akšamija, Semir Halilović, Muhamed Kozadra, Zvonko Marić, Segmedina Srna Bajramović.

Nakon diskusija, predsjedateljica je pozvala zastupnike da se izjasne.

SKUPŠTINA JE VEĆINOM GLASOVA (25 „ZA“) DONIJELA ODLUKU O DAVANJU SAGLASNOSTI NA FINANSIJSKI PLAN ZAVODA ZDRAVSTVENOG OSIGURANJA KANTONA SARAJEVO ZA 2016. GODINU I ODLUKU O IZVRŠAVANJU FINANSIJSKOG PLANA ZAVODA ZDRAVSTVENOG OSIGURANJA KANTONA SARAJEVO ZA 2016. GODINU.

Šesta tačka dnevnog reda:

AD – 6.

PRIJEDLOG ODLUKE O DAVANJU SAGLASNOSTI NA PROGRAM RADA ZAVODA ZDRAVSTVENOG OSIGURANJA KANTONA SARAJEVO ZA 2016. GODINU

Zastupnici su dobili Prijedlog odluke ste uz poziv za sjednicu.

Ministrica zdravstva Zilha Ademaj je podnijela uvodno izlaganje u ime predstavnika Predlagača.

Kako nije bilo prijavljenih zastupnika za pitanja ili diskusiju, predsjedateljica je pozvala na izjašnjavanje.

SKUPŠTINA JE VEĆINOM GLASOVA (26 „ZA“) DONIJELA ODLUKU O DAVANJU SAGLASNOSTI NA PROGRAM RADA ZAVODA ZDRAVSTVENOG OSIGURANJA KANTONA SARAJEVO ZA 2016. GODINU

Sedma tačka dnevnog reda:

AD – 7.

PRIJEDLOG ODLUKE O USVAJANJU "BILANSA ENERGETSKIH POTREBA KANTONA SARAJEVO ZA 2016. GODINU"

Predsjedateljica je napomenula da su zastupnici dobili materijale uz poziv za sjednicu. Zastupnici su smatrali da nema potrebe za uvodnim izlaganjem, niti su postavili pitanja. U diskusiji je učestovala zastupnica Neira Avdibegović.

SKUPŠTINA JE SA 28 GLASOVA „ZA“ DONIJELA ODLUKU O USVAJANJU "BILANSA ENERGETSKIH POTREBA KANTONA SARAJEVO ZA 2016. GODINU

Tačka osam:

AD – 8.

PRIJEDLOG ODLUKE O POTVRĐIVANJU PROGRAMA OBILJEŽAVANJA DANA KANTONA SARAJEVO OD 02. DO 09.05.2016. GODINE

Zastupnici su smatrali da nema potrebe za uvodnim izlaganjem, a nije bilo postavljanja pitanja niti diskusije, te je predsjedateljica pozvala prisutne na izjašnjavanje.

SKUPŠTINA JE SA 28 GLASOVA „ZA“ DONIJELA ODLUKU O POTVRĐIVANJU PROGRAMA OBILJEŽAVANJA DANA KANTONA SARAJEVO OD 02. DO 09.05.2016. GODINE.

Deveta tačka dnevnog reda

AD – 9.

PRIJEDLOG ODLUKE O PRIHVATANJU ZADUŽENJA KANTONA SARAJEVO PO UGOVORU BROJ 1. O AMANDMANU NA UGOVOR O ZAJMU POTPISAN 27. OKTOBRA 2011. GODINE IZMEĐU BOSNE I HERCEGOVINE I EVROPSKE BANKE ZA OBNOVU I RAZVOJ (EBRD), ZA PROJEKAT GRADSKIH SAOBRAĆAJNICA

Prema mišljenju zastupnika nije bilo potrebe za uvodnim izlaganjem.

Pitanje je postavila zastupnica Bibija Kerla na što je odgovorio ministar Finansija Jasmin Halebić.

Predsjedateljica je nakon toga pozvala prisutne na izjašnjavanje.

SKUPŠTINA JE VEĆINOM GLASOVA (20 „ZA“) DONIJELA ODLUKU O PRIHVATANJU ZADUŽENJA KANTONA SARAJEVO PO UGOVORU BROJ 1. O AMANDMANU NA UGOVOR O ZAJMU POTPISAN 27. OKTOBRA 2011. GODINE IZMEĐU BOSNE I HERCEGOVINE I EVROPSKE BANKE ZA OBNOVU I RAZVOJ (EBRD), ZA PROJEKAT GRADSKIH SAOBRAĆAJNICA.

Deseta tačka dnevnog reda:

AD – 10.

PRIJEDLOG ODLUKE O POTVRĐIVANJU IMENOVANJA PREDSJEDNIKA I ČLANOVA SKUPŠTINE KJKP „GRADSKI SAOBRAĆAJ“ D.O.O. SARAJEVO

Zastupnici su Prijedlog odluke dobili u dopunskom materijalu. Nisu postavili pitanja, a u diskusiji je učestvovao zastupnik Semir Halilović.

Predsjedateljica je pozvala prisutne na izjašnjavanje.

SKUPŠTINA JE VEĆINOM GLASOVA (19 „ZA“) DONIJELA ODLUKU O POTVRĐIVANJU IMENOVANJA PREDSJEDNIKA I ČLANOVA SKUPŠTINE KJKP „GRADSKI SAOBRAĆAJ“ D.O.O. SARAJEVO

Jedanaesta tačka dnevnog reda:

AD – 11.

PRIJEDLOG ODLUKE O DAVANJU SAGLASNOSTI NA PROGRAM RADA I FINANSIJSKI PLAN FONDA KANTONA SARAJEVO ZA IZGRADNJU I OČUVANJE GROBALJA ŠEHIDA I POGINULIH BORACA, MEMORIJALNIH CENTARA I SPOMEN-OBILJEŽJA ŽRTAVA GENOCIDA ZA PERIOD 01.01. DO 31.12.2016. GODINU

Zastupnici su bili mišljenja da nema potrebe za uvodnim napomenama, nisu postavili pitanja niti je bilo prijavljenih za diskusiju, te je predsjedateljica pozvala na izjašnjavanje.

SKUPŠTINA JE SA 26 GLASOVA „ZA“ DONIJELA ODLUKU O DAVANJU SAGLASNOSTI NA PROGRAM RADA I FINANSIJSKI PLAN FONDA KANTONA SARAJEVO ZA IZGRADNJU I OČUVANJE GROBALJA ŠEHIDA I POGINULIH BORACA, MEMORIJALNIH CENTARA I SPOMEN-OBILJEŽJA ŽRTAVA GENOCIDA ZA PERIOD 01.01. DO 31.12.2016. GODINU.

Dvanaesta tačka dnevnog reda:

AD – 12.

PRIJEDLOG ODLUKE O DAVANJU SAGLASNOSTI NA PROGRAM RADA FONDA KANTONA SARAJEVO ZA IZGRADNJU STANOVA ZA ČLANOVE PORODICA ŠEHIDA I POGINULIH BORACA, RATNE VOJNE INVALIDE, DEMOBILISANE BORCE I PROGANE OSOBE ZA 2016.GODINU

Uvodno izlaganje po ovoj tački je podnio ministar prostornog uređenja, građenja i zaštite okoliša Čedomir Lukić.

Nije bilo prijavljenih zastupnika za pitanja ili diskusiju, te je predsjedavajuća pozvala na glasanje.

SKUPŠTINA JE SA 24 GLASA „ZA“ DONIJELA ODLUKU O DAVANJU SAGLASNOSTI NA PROGRAM RADA FONDA KANTONA SARAJEVO ZA IZGRADNJU STANOVA ZA ČLANOVE PORODICA ŠEHIDA I POGINULIH BORACA, RATNE VOJNE INVALIDE, DEMOBILISANE BORCE I PROGANE OSOBE ZA 2016.GODINU

Trinaesta tačka dnevnog reda:

AD – 13.

PRIJEDLOG ODLUKE O DAVANJU SAGLASNOSTI NA FINANSIJSKI PLAN PRIHODA I RASHODA ZA 2016. GODINU FONDA KANTONA SARAJEVO ZA IZGRADNJU STANOVA

Kako nije bilo prijavljenih za uvodna izlaganja, postavljanje pitanja ili diskusiju predsjedateljica je odmah pozvala zastupnike na izjašnjavanje.

SKUPŠTINA JE SA 24 GLASA „ZA“ DONIJELA ODLUKU O DAVANJU SAGLASNOSTI NA FINANSIJSKI PLAN PRIHODA I RASHODA ZA 2016. GODINU FONDA KANTONA SARAJEVO ZA IZGRADNJU STANOVA.

Četrnaesta tačka dnevnog reda:

AD – 14.

- a) PRIJEDLOG ODLUKE O IZMJENI NAZIVA ULICA ODNOSNO PREIMENOVANJU ULICA NA PODRUČJU OPĆINE NOVI GRAD SARAJEVO- MZ DOLAC;**
- b) PRIJEDLOG ODLUKE O IZMJENI NAZIVA ULICA ODNOSNO PREIMENOVANJU ULICA NA PODRUČJU OPĆINE NOVI GRAD SARAJEVO- MZ BRIJEŠĆE**

Predsjedateljica je predložila, a zastupnici prihvatili, da se provede jedinstvena rasprava o oba prijedloga odluka.

Zastupnik Semir Halilović je postavio pitanje na što je odgovor dao zastupnik Nermin Bjelak u svojstvu Predlagača odluka.

- a) SKUPŠTINA JE VEĆINOM GLASOVA (18 „ZA“) DONIJELA ODLUKU O IZMJENI NAZIVA ULICA ODNOSNO PREIMENOVANJU ULICA NA PODRUČJU OPĆINE NOVI GRAD SARAJEVO- MZ DOLAC.**
- b) SKUPŠTINA JE VEĆINOM GLASOVA (18 „ZA“) DONIJELA ODLUKU O IZMJENI NAZIVA ULICA ODNOSNO PREIMENOVANJU ULICA NA PODRUČJU OPĆINE NOVI GRAD SARAJEVO- MZ BRIJEŠĆE**

Petnaesta tačka dnevnog reda:

AD – 15.

IZVJEŠTAJ O RADU KANTONALNE UPRAVE CIVILNE ZAŠTITE ZA 2015.GODINU

U ime Predlagača Izvještaj je obrazložio direktor Kantonalne uprave civilne zaštite Mustafa Kovač.

Nije bilo prijavljenih zastupnika za pitanja ili diskusiju pa je predsjedateljica pozvala prisutne na izjašnjavanje.

SKUPŠTINA JE JEDNOGLASNO (27 „ZA“) USVOJILA IZVJEŠTAJ O RADU KANTONALNE UPRAVE CIVILNE ZAŠTITE ZA 2015.GODINU.

Šesnaesta tačka dnevnog reda:

AD –16.

IZVJEŠTAJI O RADU I FINANSIJSKOM POSLOVANJU JAVNIH USTANOVA ZA 2015.GODINU:

1. Narodno pozorište Sarajevo ;
2. Pozorište mladih ;
3. Sarajevski ratni teatar - SARTR ;
4. MES - Međunarodni teatarski festival - Scena MESS ;
5. Muzej Sarajeva ;
6. Kantonalni zavod za zaštitu kulturno-historijskog i prirodnog naslijeđa, Sarajevo ;
7. Historijski arhiv Sarajevo ;
8. Biblioteka Sarajeva ;
9. Centar za kulturu Kantona Sarajevo

Zastupnici su jednoglasno podržali prijedlog predsjedateljice da se vodi jedinstvena diskusija o svim izvještajima ustanova iz oblasti kulture, a pojedinačno izjašnjavanje.

Uvodno izlaganje je podnio ministar kulture i sporta Mirsad Kurić.

Kako nije bilo prijavljenih diskutanata, predsjedateljica je pozvala na pojedinačno izjašnjavanje.

a)
SKUPŠTINA NIJE USVOJILA IZVJEŠTAJ O RADU I FINANSIJSKOM POSLOVANJU JU „NARODNO POZORIŠTE SARAJEVO“ ZA 2015.GODINU (11 „ZA“, 12 SUZDRŽANO)

b)
SKUPŠTINA NIJE USVOJILA IZVJEŠTAJ O RADU I FINANSIJSKOM POSLOVANJU JU „POZORIŠTE MLADIH“ ZA 2015.GODINU. (8 „ZA“, 15 SUZDRŽANO)

c)
SKUPŠTINA NIJE USVOJILA IZVJEŠTAJ O RADU I FINANSIJSKOM POSLOVANJU JU JU „SARAJEVSKI RATNI TEATAR - SARTR“ ZA 2015.GODINU (7 „ZA“, 16 SUZDRŽANO)

d)
SKUPŠTINA NIJE USVOJILA IZVJEŠTAJ O RADU I FINANSIJSKOM POSLOVANJU JU „MES - MEĐUNARODNI TEATARSKI FESTIVAL - SCENA MESS“ ZA 2015.GODINU (8 „ZA“, 15 SUZDRŽANO)

e)
SKUPŠTINA NIJE USVOJILA IZVJEŠTAJ O RADU I FINANSIJSKOM
POSLOVANJU JU „MUZEJ SARAJEVA“ ZA 2015.GODINU.
(8 „ZA“, 15 SUZDRŽANO)

f)
SKUPŠTINA NIJE USVOJILA IZVJEŠTAJ O RADU I FINANSIJSKOM
POSLOVANJU JU „KANTONALNI ZAVOD ZA ZAŠTITU KULTURNO-
HISTORIJSKOG I PRIRODNOG NASLIJEĐA, SARAJEVO “ ZA 2015.GODINU
(7 „ZA“, 15 SUZDRŽANO)

g)
SKUPŠTINA NIJE USVOJILA IZVJEŠTAJ O RADU I FINANSIJSKOM
POSLOVANJU JU „HISTORIJSKI ARHIV SARAJEVO“ ZA 2015.GODINU
(7 „ZA“, 15 SUZDRŽANO)

h)
SKUPŠTINA NIJE USVOJILA IZVJEŠTAJ O RADU I FINANSIJSKOM
POSLOVANJU JU „BIBLIOTEKA SARAJEVA“ ZA 2015.GODINU
(7 „ZA“, 1 „PROTIV“, 15 SUZDRŽANO)

i)
SKUPŠTINA NIJE USVOJILA IZVJEŠTAJ O RADU I FINANSIJSKOM
POSLOVANJU JU „CENTAR ZA KULTURU KANTONA SARAJEVO“ ZA
2015.GODINU
(7 „ZA“, 15 SUZDRŽANO)

Predsjedateljica je zaključila sjednicu u 17,00 sati.

Zapisnik izradila:

Lejla Kadrić

Po ovlaštenju

SEKRETAR

SKUPŠTINE KANTONA SARAJEVO

Almira Kulovac Šetkić, dipl. pravnik

PREDSJEDATELJICA

SKUPŠTINE KANTONA SARAJEVO

Prof. Ana Babić